

GENESIS

NDI BUKE ZOMUHOWO ZAMOESA

Esito

1 Pomuhowo Karunga kwa sitire eguru nevhу. ²Evhу kwa lirumbabumbire, alyo hena mawoko-woko lya kere. Ano mundema makura tagu kudumike etondo lyomema. Mpepo zaKarunga ngazi teremba nye kontunda zomema. ³Makura Karunga ta tanta asi: "Uzera u kare po." Makura uzera tau kara po. ⁴Ano Karunga eyi ga mona asi uzera una zire mo, makura ta hangura nye uzera komundema. ⁵Uzera Karunga ta u ruku 'Mutenya', ano mundema ta gu ruku 'Masiku'. Tapa kara nye ngurova nongurangura. Olyo ngoso ezuva lyomuhowo.

"Karunga makura ta panga asi: "Pa kare mbando zokugaununa mema, asi ga kare pomavega gavali gokulikarera." Makura tayi kara po. ⁷Yimo nye ga peke po ngoso Karunga mbando zokuhangura mema ga kare konhi zazo, gamwe keguru lyazo; ⁸mbando makura ta zi ruku 'Eguru'. Tapa kara ngurova nongurangura. Olyo ngoso ezuva lyauvali.

"Makura Karunga ta panga asi: "Mema gokonhi zeguru ga ponge pamwe tupu, ukukutu u moneke." Makura tayi kara po. ¹⁰Ukukutu ta u ruku 'Evhу', ano mema aga ga pongere, ta ga ruku 'Efuta'. Makura ta tara eyi ga rugene, hawe yina wapa. ¹¹Makura ta panga asi: "Evhу li mene yimeno peke-peke, yimwe yokuyima mbuto, ano eyi yimwe yokuyima enyango." Makura tayi kara po.

¹²Makura evhu tali mene yimeno peke-peke, yimwe yonombuto, ano eyi yimwe yokuyima enyango. Karunga makura ta tara eyi ga rugene, ta yi mono asi yina wapa. ¹³Tapa kara nye ngurova nongurangura. Olyo ngoso ezuva lyautatu.

¹⁴Karunga makura ta panga asi: "Ku kare mauzera keguru gokuhangura mutenya nomasiku. Ga kare yidiviso yomazuvu nonomumvhо noyiruwo.

¹⁵Ngayi teme keguru yi gave uzera kouzuni." Makura taga kara po.

¹⁶Karunga makura ta paka po mauzera gomanene gavali, ezuva lyokupangera mutenya, ano kwedi kokupangera masiku; age kwa peke po hena nombungururu. ¹⁷Age kwa tulire mauzera keguru ga minikire uzuni, ¹⁸ga pangere mutenya nomasiku, ago hena ga hangure uzera nomundema. Ta tara eyi ga rugene, ta yi mono asi yina wapa. ¹⁹Tapa kara ngurova nongurangura. Olyo ngoso ezuva lyayne.

²⁰Karunga ta panga asi: "Mema ga kare noyinamwenyo peke-peke, ano yidira yi tuke keguru." Makura tayi kara po. ²¹Yimo nye ga sitire ngoso Karunga mamukorama gomanene noyinamwenyo nayinyе eyi ya likohere momema, noyidira yomarudi peke-peke. Ga yi tara eyi ga rugana, ta mono asi yina wapa. ²²Age makura ta yi tungikisa kompangera ezi asi:

"Yinamwenyo yomomema ngayi livhare tayi zura mefuta, yidira nayo ngayi vhuke." ²³Ngurova tazi ka pita, ngurangura tazi wiza. Olyo ngoso ezuva lyautano.

²⁴Karunga ta panga asi: "Pevhu pa kare yimuna peke-peke noyikorama peke-peke yoyinene neyi yoyinunu." Makura tayi kara po. ²⁵Yimo nye ga sitire ngoso yimuna peke-peke noyikorama peke-peke yoyinene neyi yoyinunu. Ga tara eyi ana rugana, ta mono asi yina wapa.

²⁶Karunga makura ta ninki asi: "Ntaantani tatu ungeni po nye vantu; muntu nga kare ngwendи nyose, a tu fane. Age nga pangere nomfi

domomema noyidira yekeguru
noyimuna noyikorama nayinye
yoyinene neyi yoyinunu yepevhу.”
²⁷Makura Karunga ta ungu nye vantu;
muntu kwa mu ungire a fane Karunga.
Age kwa va ungire mugara nomukadi.
²⁸Makura ta va tungikisa kom pangera
ezi asi: “Livhareni mu zwide evhu,
makura ruvharo rweni ngaru li
pangere. Tani mu pe nonkondo
dokupangera nomfi noyidira
noyikorama nayinye yoyinene neyi
yoyinunu.” ²⁹Karunga ta tanta hena
asi: “Tani mu pe nombuto nadinye
nenyango nalinye lyomouzuni mudima
mu lye; ³⁰nye yikorama yoyinene neyi
yoyinunu nayinye noyidira nayinye,
tani yi pe yimeno yoyitarara, yido
nondya dayo.” Makura tayi kara po.
³¹Ano Karunga eyi ga tara nayinye eyi
ga rugene, tayi mu zi komutjima.
Ngurova tazi ka pita, ngurangura tazi
wiza. Olyo ezuva lyautano-nalimwe.

2 Makura evhu neguru neyi ya kara
ko nayinye tayi pu kusita. ²Mezuva
lyautano-naauvali Karunga age ana
mana eyi ga rugene, mezuva olyo yimo
ga pwizumukire. ³Age kwa tungikire
ezuva lyautano-naauvali, ta li pongora
mo momakwawo li likarere, yeeyi
mezuva olyo yimo ga mene esito
lyendi, a hulise kurugana. ⁴Yimo nye
ngoso ga sitire evhu neguru neyi ya
kara-kara ko nayinye.

Sikunino saEdeni

Apa ga sitire Karunga evhu neyi
nayinye ya kara keguru, ⁵kapi pwa kere
yimeno pevhу ndi mbuto asi zi mene,
yeeyi kapi ga tumine mvhura pevhу.
Apo hena kapi pwa kere gokulima
mapya. ⁶Nampili ngomu pwa pilire
mvhura, eundu ngali tuntuka li
nengedeke evhu.

⁷Makura HOMPA Karunga ta gusa
evhu limwe a li unge muntu, ta mu
heserere munku gomwenyo
momazuru, makura muntu ta kara
munamwenyo.

⁸Makura Karunga ta rugana

sikunino moEdeni, korwa Upumezuva,
makura ta tura mo muntu ogu ga
ungire. ⁹Karunga ta menesa mo yitji
yomarudi peke-peke yoyiwa mokutara,
eyi ngayi yimi enyangi lyewa. Pokatji
kosikunino pa kere nye sitji sokugava
mwenyo, nesi sokugava ediwо lyeyi
yoyiwa neyi yoyidona.

¹⁰Mukuro makura tagu tundilire
moEdeni gu tekere sikunino, ano ago
kwa ligaunwine monomukuro ne.

¹¹Edina lyomukuro gomuhowo Pisoni;
ago yigo gwa kunduruka sirono
saHavhira. (¹²Omo yimo nye ava gwana
ngorodo zene-zene, nomanganganga
gomulyo nomamanya gomageha
goonikisi.) ¹³Edina lyomukuro
gwauali Gihoni; ago kwa kunduruka
sirono saKusi. ¹⁴Mukuro gwautatu
Tigilisi, ogu gwa genda koUpumezuva
waAsuli. Mukuro gwaune Efurata.

¹⁵Makura HOMPA Karunga yipo nye
ga damwine muntu, ta mu tura
mosikunino saEdeni a si rugane a si
pakere mbili. ¹⁶Age kwa pangere
muntu asi: “Yiyimwa yokoyitji
nayinye yomosikunino kulya tupu,
¹⁷ntudi yokositji esi asi gava ediwо
lyeyi yoyiwa neyi yoyidona no.
Siyimwa saso nokanunu si asi o si lye.
Nsene ngo yi hetekera, ngo fa lyoolyo
czuva.”

¹⁸HOMPA Karunga makura ta ninki
asi: “Kapisi nawa asi muntu a kare
gelike. Tani mu ruganene ko
gokumuhamena, mukwafi gwendi.”

¹⁹Makura ta gusa evhu limwe, ta
rugana yikorama nayinye yepevhу
noyidira nayinye yekeguru, makura ta
yi retere muntu a tare omu na yi ruka.
Ano madina aga ga yi ruka-rukire
muntu, yigo ga kara madina gayo.
²⁰Makura muntu ta ruku yimuna
nayinye noyidira noyikorama; nye
gokumuhamena mukwafi gwendi
kutupu.

²¹Makura HOMPA Karunga ta
ponyokesa muntu nompofu dokufa
nokutara. Ano eyi ga ponyoka ngoso,
Karunga ta mu gusa rupatji rumwe, ta
sitike po opo nonyama. ²²Oro rupatji

oru ga gusire momugara, ta ru rugana mukadi, makura ta mu mu retere.

²³Makura mugara ta tanta asi:

“Hawe ogu ntaantani
damu-damu nyame nye,
sisupa somoyisupa yange,
nonyama zomonyama zange.
‘Mukadigara’ yilyo edina lyendi,
yeeyi age kuna mu gusa
momugara.”

²⁴Yipo nye a sigire mugara nozina, makura ta likwatakana namukadindi, makura tava kara gumwe tupu.

²⁵Navenye pouvali wawo maruturu va kere, nye kapi va fire nomuga.

Kuzona komuntu

3 Ano ezoka kwa kere
nomamundunge kuitakana
yikorama nayinye eyi ga sitire HOMPA
Karunga. Ezoka makura tali pura
mukadi asi: “Enye sili Karunga ga mu
tantera asi walye omu li yiylimwa
yokoyitji eyi ya kara mosikunino ndi?”

²Mukadi ta limburura asi: “Ose
kuvhura kulya yiylimwa yokoyitji eyi
yomosikunino, ³ntudi yokositiji
sopokatji no. Karunga kwa tanta asi,
nokulya si siyimwa sokositiji oso, ndi
nampili kuguma kooku nokusiguma si;
nsene tu yi hetekera, ngano ngatu fa.”

⁴Ezoka tali limburura asi:
“Ndangako asi ngomu fe one.
⁵Karunga kwa yi tantera eyi morwa ga
diva asi nsene ngomu lya ko, neisi
ngomu gwana nondunge, ngomu mu
fane mokudiva yoyiwa neyi yoyidona.”

⁶Mukadi makura ta tara oso sitji
omu sa fuura nomu ya wapa yiylimwa
yaso mokutara, ta gazara omu ya wapa
yokukara nonondunge. Makura ta gusa
ko siyimwa simwe, ta li. Ga ninka ta
pe ko yendi, makura nage ta li. ⁷Kwa
mana tupu kulya, tava gwana
nondunge, tava limono asi muhere-
here vana kara; yipo nye va ninkire va
tunge yihako youkuzu va livive.

⁸Ngurova ozo ako kuna tenderere,
tava zuvhу HOMPA Karunga ta gendi
mosikunino, makura awo tava ka
vanda mokatji koyitji. ⁹Nye HOMPA

Karunga ta zigida muntu asi: “Kupi
oku ono kara?” ¹⁰Mugara ta limburura
asi: “Nina ku zuvhу mosikunino, ame
kuna tjira, yiyo nina ka vanda, yeeyi
muhere-here nina kara.”

¹¹“Ogu ana ku tantere asi muhere-
here ono kara yilye ogo?” Yimo ga mu
pulire Karunga. “Ndi kuna li siyimwa
esi na ku sansekera asi nokusilya si?”

¹²Mugara ta limburura asi: “Mukadi
ogu wa pa nge, yige ana pe nge
siyimwa asi ni lye, name yiyo na li.”

¹³HOMPA Karunga ta pura mukadi
asi: “Yinke eyi ono yi ruganene?”
Gwina ta limburura asi: “Ezoka lina
kumbagere nge, makura yiyo na li.”

Karunga ta divisa mfuto zonzo

¹⁴Makura HOMPA Karunga ta tantere
ezoka asi:

“Pweyi yipo nava ku futisira,
moyimuna nayinye
nomoyikorama nayinye yepevhу
efingiliro lyanyovelike lyeli asi:
Kutunda apa ove ngo wovanesa
kezimo lyoge,
mbundu yido nondya doge ngadi
kara.

¹⁵Ngani paka unkore pokatji koge
nomukadi
pokatji koruvaro roge noru rwendi.
Aro ngaru myona mutwe goge,
ove ngo ru huma kosinsinsina
saro.”

¹⁶Karunga makura ta tantere
mukadi asi:

“Ngani nenepeka udigu woge
pokukara nezimo,
nokukora pokuhampuruka koge,
nye meharo nyove tupu kuhara
yoge,

ano age nga kara mupangeli goge.”

¹⁷Karunga ta tantere hena Adamu asi:
“Ove kuna zuvhу lyamukadoge,
yiyo ono li siyimwa esi na tanta
asi nokusilya si.

Moomu ono yi rugana eyi,
evhu ngani li fingilira.
Ngo rugana unene ukaro woge
naunye,
ngali ku pe nondya dina gwana po.

GENESIS 3

¹⁸Ngali ku menesera mega
noyihwa nononhonho,
ano ove ngo lya yimeno
yomosanzara.

¹⁹Ngo rugana unene, to tjimpuka
asi o gwane nondya,
dogoro noku ngo tengwira
mevhу omu va ku gusa.
Yeeyi ove kwa tunda mevhу,
makura ngo kara hena evhu.”

²⁰Mugara makura ta ruku
mukadendi Eva, yeeyi yige zinyavantu
navenye.

²¹HOMPA Karunga makura ta
ruganene oAdamu namukadendi
yidwara yoyipapa yoyikorama, ta va
dwareke.

*Adamu naEva tava va gusa
mosikunino*

²²Makura HOMPA Karunga ta tanta
asi: “Ntaantani muntu damu-damu
nyose tupu nye, yeeyi ana kara nye
nediwo lyeyi yoyiwa neyi yoyidona.
Nokumutarerera si hena a lye siyimwa
sokositji somwenyo, nga dire kufa.”

²³HOMPA Karunga yipo nye ga mu
gusire mo mosikunino saEdeni, a mu
ninke a ka rugane evhu omu va mu
gusa. ²⁴Karunga kwa tjidire mo
muntu, makura koUpumezuva
wosikunino saEdeni, ta tura ko
vakerubi negonga lyomundiro
lyokuvyuka-vyuka komaruha nagenye.
Alyo lyokukonderesa nkenye ogu ana
kuhara kuwiza kositji somwenyo.

Die Bybel
in KWANGALI

Eerste uitgawe 1987

© BYBELGENOOTSKAP VAN SUID-AFRIKA 1987

The Bible

in KWANGALI

First edition 1987

© BIBLE SOCIETY OF SOUTH AFRICA 1987

ISBN 0 7982 0800 7